



Sumáriu Kazu
Tribunál Distritál Suai
Períodu Dezembru 2018

Afirmasaun: Sumáriu Kazu tuirmai ne'e deskreve faktu sira no prosesu iha Tribunál tuir JSMP nia monitorizasaun independente, no deklarasaun ne'ebé parte sira fó iha Tribunál nia laran. Informasaun ne'e la representa JSMP nia hanoin hanesan instituisaun ida. JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma laiha justifikasaun ba violénsia hasoru fetu.

A. Sumáriu prosesu julgamentu kazu iha Tribunál Distritál Suai

1. Totál kazu ne'ebé JSMP monitoriza : 18

Artigu	Tipu Kazu	Númeru
Artigu 145 Kódigu Penál (KP) no konjuga ho artigu 2, 3, 35(b) no 36 LKVD	Ofensa ba integridade fízika simples ho natureza violénsia doméstika (artigu 2 kona-ba konseitu violénsia doméstika, artigu 3 kona-ba relasaun família, artigu 35 kona-ba tipu krime violénsia doméstika sira no artigu 36 kona-ba krime sira violénsia doméstika nian hanesan krime públiku)	2
Artigu 177 (KP)	Abuzu seksuál ba menór	1
Artigu 172 (KP)	Violasaun seksuál ho agravasaun	1
Artigu 23, 24, 139 (g) (KP) no konjuga ho artigu 2, 3, 35(b) no 36 LKVD	Tentativa, tentativa nia punibilidade ba krime omisídiu agravadu ho natureza violénsia doméstika	1
Artigu 138 (KP)	Omisídiu simples	1
Artigu 23 & 138 (KP)	Tentativa omisídiu simples	1
Artigu 251 (KP)	Furtu simples	1
Artigu 259 (KP)	Danu agravadu	1
Artigu 316 (KP)	Kontrabandu □	2
Artigu 145 (KP)	Ofensa ba integridade fízika simples	7
Totál		18

Rua Beco Lakateu, Aldeia Manu fuik,
Suku Colmera, Administrativu Vera Cruz
Dili Timor Leste
PoBox: 275

Telefone: 3323883 | 77295795

www.jsmp.tl

info@jsmp.minihub.org

Facebook: www.facebook.com/timorleste.jsmp

Twitter: @JSMPtl

2. Totál desizaun ne'ebé JSMP monitoriza : 10

Tipu Pena	Númeru
Pena prizaun	1
Suspensaun ba prizaun nia ezekusaun (artigu 68 KP)	2
Pena multa (artigu 67 KP)	1
Omologa dezisténsia keixa (artigu 262 KPP)	5
Absolve	1
Totál	10

3. Total kazu sira ne'ebé adia tuir JSMP nia monitorizasaun : 5

Razaun adiamentu	Númeru
Transporte hosi prizaun kondisaun aat	1
Mina ba transporte hosi prizaun laiha	1
Arguidu la marka prezensa	3
Totál	5

4. Totál kazu sira ne'ebé sei kontinua tuir JSMP nia monitorizasaun : 3

B. Deskripsaun sumariu ba desizaun kazu sira ne'ebé JSMP monitoriza:

1. Krime ofensa ba integridade fízika simples

Nú. Prosesu : 0011/15.MFMFI
Kompozisaun Tribunál : Singulár
Juis : Dr. Nasson Sarmiento
Prokuradór : Dr. Napoleão Soares da Silva
Defeza : Dr. Manuel Amaral
Tipu Pena : Omologa pedidu dezisténsia keixa

Iha 03 Dezembru 2018, Tribunál Distritál Suai prezide julgamentu tentativa konsiliaun ba krime ofensa ba integridade fízika simples ne'ebé envolve Arry Worang hasoru lezadu João Nunes Gonzaga nu'udar impregadu iha loja My Friend, iha Aldeia Kotalala, Suku Letefoho, Sub-distritu Same, Distritu Manufahi.

Akuzasaun Prokuradór

Prokuradór akuza katak iha 25 Jullu 2015, tuku 03:00 madrugada, iha loja My Friend nia oin, arguidu tuku lezadu dala rua iha matan fukun parte karuuk. Konsekuensia hosi agresaun ne'e,

rezulta lezada nia matan sofre bubu no metan. Lezadu ba halo tratamentu iha Óspital Referal Manufahi. Antes ne'e arguidu no lezadu iha ona problema partikulár.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa.

Produsaun ba prova sira

Antes tama ba produsaun ba prova sira, bazeia ba artigu 262 KPP kona-ba tentativa ba konsiliaaun, juis husu atu halo tentativa konsiliaaun ba arguidu no lezada.

Iha prosesu konsiliaaun ne'e, lezadu hakarak dada fali keixa ho kritéria katak arguidu husu deskulpa ba lezadu no promete sei la halo tan krime ne'e iha futuru. Arguidu konkorda ho pedidu ne'e no husu kedas deskulpa ba lezadu iha tribunál nia oin. Arguidu mós deklara katak arrepende ninia hahalok no promete sei la halo tan krime ne'e iha futuru hasoru lezadu no ema seluk.

Alegasaun finál

Prokuradór no defeza konkorda ho akordu dame ne'ebé parte rua decide ona no husu ba tribunál atu omologa prosesu ne'e.

Desizaun

Bazeia ba pedidu dezisténsia hosi lezadu no akordu dame hosi parte sira, tribunál konklui prosesu ne'e no omologa akordu dame entre parte sira.

2. Krime danu agravadu

Nú. Prosesu	: 0006/14.MFMFI
Kompozisaun Tribunál	: Kolektivu
Juis	: Dra. Florencia Freitas, Dr. Nasson Sarmiento no Dr. Samuel da Costa Pacheco
Prokuradór	: Dr. Matias Soares
Defeza	: Dr. Albino de Jesus Pereira
Tipu pena	: Pena prizaun tinan 3 suspende ba tinan 4

Iha 03 Dezembru 2018, Tribunál Distritál Suai prezide leitura akordaun ba krime danu agravadu ne'ebé envolve arguidu Pedro de Jesus Barbosa no Eldito da Costa, hasoru Edifísiu Administrasaun Minisípiu Manufahi, iha Suku Holarua, Sub-distritu Same, Distritu Manufahi.

Akuzasaun Prokuradór

Prokuradór akuza katak iha 04 Abril 2014, arguidu na'in-rua tuda Edifísiu Administrasaun Munisípiu Manufahi rezulta vidru rahun no kalen ida iha parte Gabinete Administradór nian

hetan kabetak. Depoizde tuda, arguidu na'in-rua halai husik hela kamiza ida no besi beton ida ho naruuk metru 12.

Prokuradór akuza arguidu sira kontra artigu 259 KP pontu 1(a) kona-ba danu agravadu relasiona ho utilidade pública ho moldural penál hosi tinan 2 to'o tinan 8.

Produsaun ba prova sira

Iha prosesu julgamentu, arguidu sira konfesa totalmente ba faktu sira ne'ebé prokuradór akuza hasoru sira no deklarata katak sira prontu hadia fila fali sasan ne'ebé estraga ona. Arguidu sira hatutan katak sira tuda edifísiu ne'e tanba hakarak servisu nu'udar seguransa iha edifísiu refere, maibé seidauk loke prosesu ba pozisaun seguransa nian. Arguidu sira deklarata katak sira arrepende sira ninia hahalok no foin primeiravés hatan iha tribunál. Arguidu sira promete sei la halo tan krime ne'e iha futuru.

Iha parte seluk, Zakeu Marcal nu'udar seguransa sivíl ne'ebé representa autoridade Munisípiu Manufahi nu'udar lezadu iha kazu ne'e kontinua reforsa faktu sira iha akuzasaun prokuradór.

Testemuña João da Costa Oliveira nu'udar seguransa iha Edifísiu Administrasaun Munisípiu Manufahi depoimenta katak iha momentu ne'ebá testemuña ba han tiha iha nia uma ne'ebé besik ho Edifísiu Munisípiu no seguransa Zakeu Marcal mak iha edifísiu refere. Iha tuku 24:00 kalan, seguransa Zakeu rona kalen turutu iha edifísiu munisípiu no pasa informasaun ba testemuña kona-ba ema tuda ne'e. Depoizde ne'e, iha tuku 02:00 madrugada, kalen tarutu tan, nune'e testemuña hosi nia uma la'o sai ba iha moruedifísiu nia hun no sae ba tuur tiha iha moru leten.

Bainhira testemuña iha moru leten, testemuña leno lampra no leno kona arguidu na'in rua tuda hela edifísiu refere. Arguidu sira hakfodak no koko subar maibé testemuña kontinua leno lampra ba arguidu na'in-rua no hateten ba arguidu sira katak *"afinál imi na'in-rua mak tuda, imi hein aban mak ha'u ba hato'o keixa iha polisia"*. Rona testemuña koalia nune'e arguidu na'in-rua halai husik hela faru ida no besi beton lolon ida ne'ebé uza hodi halo konstrusaun ba moru iha Edifísiu Administrasaun Munisípiu Manufahi ne'e.

Alegasaun final

Prokuradór konsidera faktu sira hosi akuzasaun prokuradór nian provadu tanba arguidu sira konfesa sira ninia hahalok no testemuña mós depoimenta katak haree ho matan momentu arguidu na'in rua tuda edifísiu refere. Tanba ne'e husu ba tribunál atu kondena arguidu sira ho pena prizaun tinan tolu fulan neen suspende ba tinan lima.

Iha parte seluk, defeza husu ba tribunál atu kondena arguidu ho pena ne'ebé justu no adekuada ba arguidu sira tanba kolabora ho tribunál, konfesa, no arrepende ona sira ninia hahalok.

Aleindé ne'e sira foin dala primeiravés mai hatan iha tribunál no pruntu atu selu fila fali sasan ne'ebé sira estraga ona no promete sei la komete tan krime ne'e iha futuru.

Desizaun

Depoisde avalia faktu sira hotu, tribunál konklui katak arguidu sira komete duni krime danu agravadu ho meius tuda rahun vidru no halo kabetak kalen Edifísiu Administrasaun Munisipiu Manufahi nian. Tribunál hato'o ba arguidu na'in rua katak edifísiu ne'e nu'udar edifísiu públiku hodi atende interese públiku. Tanba ne'e, husu atu la repete hahalok ne'e iha futuru. Bazeia ba konkluzasaun no konsiderasaun ne'e, tribunál kondena arguidu ho pena prizaun tinan tolu suspende ba tinan haat.

3. Krime ofensa ba integridade fízika simples

Nú. Prosesu	: 0100/16.PDSUA
Kompozisaun Tribunál	: Singulár
Juis	: Dra. Florencia Freitas
Prokuradór	: Dr. Napoleão Soares da Silva
Defeza	: Dr. Francisco Qaetano Martins
Tipu pena	: Omologa pedidu dezisténsia keixa

Iha 03 Dezembru 2018, Tribunál Distritál Suai prezide julgamentu tentativa konsiliaun ba krime ofensa ba integridade fízika simples ne'ebé envolve arguidu Natalino da Costa nu'udar membru PNTL, hasoru lezadu Jacinto Tomás da Costa, iha Sub-distritu Suai, Distritu Covalima.

Akuzasaun Prokuradór

Prokuradór akuza katak iha 19 Jullu 2016, iha área mota Tafara nia sorin, arguidu hosi lezadu nia kotuk basa dala ida iha lezadu nia oin no tonka liman iha kanotak koalia ba lezadu katak "*sorte iha ema barak selae ha'u lori pistola tiru mate ó*". Hafafoin ida-ne'e, Anito Conceição nu'udar Polísia OPS (Ofisiál Polísia Suku) ne'ebé hamutuk ho arguidu, dada ses tiha arguidu hosi lezadu. Aktu ne'e, rezulta lezadu sofre bubu no ran iha ibun no oin nakukun.

Antes akontese agresaun ne'e, lezadu oho tiha karau aman ida-ne'ebé han tiha lezadu nia batar iha to'os laran. Depoisde oho tiha karau ne'e, lezadu bolu karau na'in atu rezolve problema ne'e iha lezadu nia uma. Iha momentu rezolve problema ne'e, Anito Conceição nu'udar polísia OPS no arguidu nu'udar membru PNTL mós marka prezensa iha ne'ebá. Iha momentu lezadu no karau na'in koalia hela kona-ba problema ne'e, derepente arguidu hosi kotuk basa lezadu.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa.

Produsaun ba prova sira

Antes tama ba produsaun ba prova sira, bazeia ba artigu 262 Kódigu Prosesu Penál kona-ba tentativa ba konsiliaun, juis husu atu halo tentativa konsiliaun ba arguidu no lezadu.

Iha prosesu konsiliaun ne'e, lezadu hakarak dada fali nia-keixa tanba antes ne'e lezadu no arguidu rezolve ona tuir dalan família. Maibé iha tribunál arguidu nafatin husu deskulpa ba lezadu no promete sei la halo tan krime ne'e iha futuru hasoru lezadu no ba ema seluk.

Alegasaun final

Prokuradór no defeza konkorda ho akordu dame ne'ebé parte rua decide ona no husu ba tribunál atu omologa prosesu ne'e.

Desizaun

Bazeia ba pedidu dezisténsia hosi lezadu no akordu dame hosi parte sira, tribunál konklui prosesu ne'e no omologa akordu dame entre parte sira.

4. Krime ofensa ba integridade fízika simples ho natureza violénsia doméstika

Nú. Prosesu	: 0059/17.BBMLV
Kompozisaun Tribunál	: Singulár
Juis	: Dr. Álvaro Maria Freitas
Prokuradór	: Dr. Matias Soares
Defeza	: Dr. Albano Maia (advogadu privadu)
Tipu pena	: Pena prizaun tinan 2 suspende ba tinan 3

Iha 10 Dezembru 2018, Tribunál Distritál Suai prezide leitura sentesa ba krime ofensa ba integridade fízika simples ho natureza violénsia doméstika ne'ebé envolve arguidu RBV hasoru nia feen, iha Distritu Bobonaro.

Akuzasaun Prokuradór

Prokuradór akuza katak iha 06 Jullu 2017, lezada hetan konvite hosi nia kolega atu ba tein ba preparasaun kampañe partidu PLP nian. Lezada fó hatene arguidu maibé arguidu la hatan atu lezada ba tein, nune'e lezada mós la ba. Iha loron hanesan, lezada ba asiste tiha televizaun iha viziñu nia uma, bainhira lezada fila no foin atu tama ba uma laran, arguidu mós to'o uma. Arguidu tun hosi nia motor leten no kaer kedas iha lezada nia bluzo no dada tama ba uma laran. Arguidu buti lezada nia hasan-hun no lori xave motor tuku dala ida iha lezada nia ulun karuuk no rezulta kanek.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa parsialmente ba faktu sira iha akuzasaun katak la lori xave motor tuku lezada nia ulun maibé lori tu'u deit lezada nia ulun. Entretantu kona-ba faktu seluk, arguidu konfesa katak nia halo duni. Maibé arguidu deklarara katak arrepende ninia hahalok no promete sei la komete tan krime ne'e iha futuru.

Entretantu lezada kontinua konfirma no reforsa faktu sira iha akuzasaun prokuradór katak diak malu ona ho arguidu no hatutan katak arguidu mak responsavel únika ba ekonómia uma-laran nian.

Alegasaun final

Prokuradór konsidera arguidu provadu komete krime hasoru lezada bazeia ba konfisaun hosi lezada ne'ebé konfirma faktu hirak iha akuzasaun. Tanba ne'e, husu ba tribunál atu kondena arguidu ho pena prizaun tinan ida suspende ba tinan haat. Prokuradór konsidera pena ne'e nu'udar meu ida atu prevene arguidu la komete tan aktu ne'e iha futuru.

Entretantu, defeza husu ba tribunál atu kondena arguidu ho pena ne'ebé justu no adekuada ba arguidu tanba konsidera katak arguidu kolabora diak ho tribunál, arrepende ninia hahalok no promete sei la komete tan krime hasoru lezada iha futuru.

Desizaun

Bazeia ba deklarasaun lezada, deklarasaun parsialmente hosi arguidu no prova dokumental hanesan relatóriu médiku, tribunál prova katak arguidu komete duni krime hasoru lezada tuir faktu sira hosi akuzasaun prokuradór nian. Tanba ne'e, tribunál konklui no kondena arguidu ho pena prizaun tinan rua suspende ba tinan tolu.

5. Krime abuzu seksuál ba menór ho agravasaun

Nú. Prosesu	: 0024 /17.ANANV
Kompozisaun tribunál	: Koletivu
Juis	: Dr. Álvaro Maria Freitas, Dr. Argentino Luisa Nunes no Dr. Benjamin Barros
Prokuradór	: Dr. Matias Soares
Defeza	: Dr. Albino de Jesus Pereira
Tipu dezisaun	: Pena prizaun tinan 7

Iha 12 Dezembru 2018, Tribunál Distritál Suai prezide leitura akordaun ba krime abuzu seksuál ba menór ho agravasaun ne'ebé envolve arguidu AM hasoru lezada nu'udar nia kuñada ho idade foin atu kompleta tinan 13, iha Distritu Ainaro.

Akuzasaun Prokuradór

Prokuradór akuza katak iha 24 Abril 2017, lezada ba vizita nia bin no bainhira lezada estuda hela iha sala vizita, arguidu kaer, buti lezada nia susun no dada lezada nia liman ba iha kuartu-laran. Iha kuartu-laran ne'e, arguidu kolu lezada nia ropa no kolu rasik nia ropa no kose nia orgaun seksuál ba lezada nia vájina no kabun to'o ejakula. Arguidu ameasa lezada atu la fó hatene akontesimentu ne'e ba família se lae arguidu oho lezada.

Depoisde ne'e, iha tinan 2017 maibé loron no fulan la apuradu, arguidu kaer tan lezada nia susun loos iha toos-laran no koalía ba lezada katak "ó sei hanoin buat uluk ne'e?" Lezada hases kedas nia-an hosi arguidu no ba relata kedas akontesimentu ne'e ba nia família.

Prokuradór akuza arguidu kontra artigu 177 (2) KP kona-ba abuzu seksuál ba menór ho moldura penál hosi tinan 5 to'o 15 tanba pratika aktu seksuál relevante ho labarik ne'ebé seidak iha tinan 14 no kontra artigu 182 KP kona-ba agravaasaun tanba lezada seidak atinje tinan 14.

Produsaun ba prova sira

Iha prosesu julgamentu, arguidu konfesa katak nia halo duni aktu sira ne'ebé hateten iha akuzasaun prokuradór nian no deklarara katak sira rezolve ona problema ne'e tuir lisan Timor nian. Arguidu entrega belak ida, tais ida no osan US\$200.00 ba lezada no família. Arguidu deklarara katak arrepende ninia hahalok no foin dala ida ba hatan iha tribunál. Arguidumós promete sei la halo tan krime ne'e iha futuru.

Aleinde ne'e, lezada kontinua reforsa faktu sira iha akuzasaun inklui konfirma ho arguidu nia deklarasaun katak kazu ne'e sira rezolve ona tuir lisan Timor nian no arguidu fó sala ona ba lezada hanesan saida mak arguidu deklarara ona.

Testemuña CM nu'udar lezada nia inan ki'ik depoimenta katak nia la hare ho matan akontesimentu maibé nia hetan informasaun hosi lezada. Tanba ne'e, testemuña lori lezada ba hato'o keixa iha polisia.

Alegasaun final

Bazeia ba arguidu no lezada nia deklarasaun prokuradór konsidera katak krime ne'e akontese duni no konsidera arguidu provadu komete krime abuzu seksuál hasoru lezada. Bazeia ba konsiderasaun ne'e, husu ba tribunál atu kondena arguidu ho pena prizaun tinan 10.

Iha parte seluk, defeza husu ba tribunál atu kondena arguidu ho pena ne'ebé justu no adekuada tanba arguidu konfesa no arrepende ninia hahalok inklui arguidu mós promete sei la komete tan krime ne'e hasoru lezada iha futuru.

Desizaun

Depoisde avalia faktu sira hosi kazu ne'e, tribunál prova katak arguidu komete duni krime tuir faktu sira iha akuzasaun. Tribunál bazeia ba arguidu no lezada nia deklarasaun, inklui relatóriu

médiku ne'ebé prova katak iha duni sinál iha lezada nia orgaun seksuál no kazu ne'e mós rezolve ona hosi parte rua, nune'e, tribunál konklui prosesu kazu ne'e no kondena arguidu ho pena prizaun tinan hitu.

6. Krime ofensa ba integridade fízika simples

Nú. Prosesu : 0061/18.PDSUA
Kompozisaun Tribunál : Singulár
Juis : Dr. Samuel da Costa Pacheco
Prokuradór : Dr. Ricardo Leite Godinho
Defeza : Dr. Albino de Jesus Pereira
Tipu pena : Omologa pedidu dezisténsia keixa

Iha 13 Dezembru 2018, Tribunál Distritál Suai prezide julgamentu tentativa konsiliaun ba krime ofensa ba integridade fízika simples ne'ebé envolve arguidu Moises de Jesus no arguida Filomena de Jesus, Teresa de Jesus no Vitoria de Jesus (feton no naan) hasoru lezada Delfina de Jesus no Veronica de Jesus Mendonsa (bin no alin) nu'udar arguidu sira nia prima no Maria de Jesus (lezada sira nia inan) nu'udar arguidu sira nia inan boot, iha Suku Camenasa, Sub-distritu Suai, Distritu Covalima.

Akuzasaun Prokuradór

Prokuradór akuza arguidu sira katak iha 22 Marsu 2018, tuku 12:00 meudia, lezada sira haree arguidu sira sunu lezada sira nia inan (Maria de Jesus) nia uma to'os, tanba lakohi lezada sira nia inan halo to'os iha rai refere, nune'e, lezada sira no arguidu sira deskute malu. Iha diskute malu ne'e, arguida Teresa de Jesus no Vitoria de Jesus lori liman rakut lezada Delfina de Jesus no lezada Veronica de Jesus Mendonsa nia fuuk. Entretantu arguidu Moises de Jesus aproveita dudu lezada na'in rua ne'e monu ba rai. Hafoin ida-ne'e, arguidu no arguida sira rasta lesuk lezada Maria de Jesus to'o monu ba rai no rezulta faru nakles.

Prokuradór akuza arguida sira kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa.

Produsaun ba prova sira

Antes tama ba produsaun ba prova sira, bazeia ba artigu 262 KPP kona-ba tentativa ba konsiliaun, juis husu atu halo tentativa konsiliaun ba arguidu no lezada sira.

Iha prosesu konsiliaun ne'e, arguidu no arguida sira husu deskulpa ba lezada sira no deklara katak arrepende sira ninia hahalok. Arguidu no arguida sira mós promete sei la halo tan krime ne'e iha futuru hasoru lezada sira no ema seluk. Lezada sira simu arguidu no arguida sira nia deskulpa no hakarak dada fali keixa ne'e.

Alegasaun final

Prokuradór no defeza konkorda ho akordu dame ne'ebé parte rua decide ona no husu ba tribunál atu omologa prosesu ne'e.

Desizaun

Bazeia ba pedidu dezisténsia hosi lezada sira no akordu dame hosi parte sira, tribunál konklui prosesu ne'e no omologa akordu dame entre parte sira.

7. Krime ofensa ba integridade fízika simples

Nú. Prosesu	: 0014/18.PDSUA
Kompozisaun Tribunál	: Singulár
Juis	: Dr. Nasson Sarmiento
Prokuradór	: Dr. Napoleão Soares da Silva
Defeza	: Escolástico da C. N Maia (advogadu privadu)
Tipu Pena	: Omologa pedidu dezisténsia keixa

Iha 14 Dezembru 2018, Tribunál Distritál Suai prezide julgamentu tentativa konsiliaun ba krime ofensa ba integridade fízika simples ne'ebé envolve arguidu Joeder Alexander Roimiranda Qhirby no Duarte Agostinho Amaral hasoru lezadu Agostinho Amaral nu'udar arguidu sira nia feton nia namorada, iha Sub-distritu Tilomar, Distritu Covalima.

Akuzasaun Prokuradór

Prokuradór akuza katak iha 16 Janeiru 2018, tuku 19:30 kalan, lezadu ho nia namorada tuur hela iha lezadu nia namorada nia kuartu-laran. Derepente arguidu Duarte Agostinho Amaral tama ba kuartu-laran ne'e no tuku dala haat iha lezadu nia oin besik matan-fukun sorin karuuk, no rezulta kanek no ran sai maka'as.

Hafoin ida-ne'e, arguidu sira nia aman (Marcos), kontaktu ba arguidu Joeder Alexander Roimiranda Qhirby hodi fila mai uma. Bainhira to'o uma, arguidu sira nia aman hateten ba arguidu Joeder katak "ema ne'e nia inan ho aman iha hela Indonezia, hare ba baku deit". Rona nia aman nia liafuan ne'e, arguidu Joeder tuku lezadu dala barak iha lezadu nia oin, ulun, kabun no kaer lezadu nia ulun no riba tun ba rai. Arguidu mós ho ain rua sama lezadu nia hirus-matan rezulta moras maka'as no tenke ba halo tratamentu iha Ospital Suai.

Prokuradór akuza arguida sira kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa.

Produsaun ba prova sira

Antes tama ba produsaun ba prova sira, bazeia ba artigu 262 KPP kona-ba tentativa ba konsiliaun, juis husu atu halo tentativa konsiliaun ba arguidu sira no lezadu.

Iha prosesu konsiliaun ne'e, arguidu sira husu deskulpa ba lezadu no deklara katak arrepende sira nia sala. Arguidu sira mós promete sei la halo tan krime ne'e iha futuru hasoru lezadu no ema seluk. Tanba ne'e, lezadu hakarak dada fali nia keixa.

Alegasaun final

Prokuradór no defeza konkorda ho akordu dame ne'ebé parte rua decide ona no husu ba tribunál atu omologa prosesu ne'e.

Desizaun

Bazeia ba pedidu dezisténsia hosi lezada sira no akordu dame hosi parte sira, tribunál konklui prosesu ne'e no omologa akordu dame entre parte sira.

8. Krime ofensa ba integridade fízika simples

Nú. Prosesu : 0014/17.PDSUA
Kompozisaun Tribunál : Singulár
Juis : Dr. Samuel da Costa Pacheco
Prokuradór : Dr. Ricardo Leite Godinho
Defeza : Dr. Albino de Jesus Pereira
Tipu Pena : Omologa pedidu dezisténsia keixa

Iha 18 Dezembru 2018, Tribunál Distritál Suai prezide julgamentu tentativa konsiliaun ba krime ofensa ba integridade fízika simples ne'ebé envolve arguidu Américo da Silva do Nascimento, Domingos da Cruz (membre PNTL) hasoru lezadu Cipriano Asuk, iha Aidila Laran, Suku Debos, Sub-distritu Suai iha Distritu Covalima.

Akuzasaun Prokuradór

Prokuradór akuza katak iha 23 Dezembru 2016, tuku 21:00 kalan, lezadu tuur hela iha nia uma, hamutuk ho nia kolega na'in-tolu. La kleur, Sr. Alfredo nia uma (foin halo) ne'ebé distánsia ho lezadu nia uma maizumenus metru lima, hetan tuda. Hafoin traballador (José Cardoso) ne'ebé iha hela uma ne'e sai hosi uma laran, hakbesik-an ba lezadu no tolok lezadu no husu ba lezadu katak se mak tuda uma ne'e. Traballadór ne'e mós foti ai baku lezadu maibé viziñu hafahe tiha sira.

La keleur polísia ne'ebé inklui ho arguidu na'in rua ho kareta patrollamentu to'o iha fatin akontesimentu noarguidu Américo tuku dala ida iha lezadu nia reen-toos no lori *stick* fai iha lezadu nia kabun. Entretantu, arguidu Domingos basa dala ida iha lezadu nia hasan karuuk no tuku dala ida iha lezadu nia oin parte karuuk. Aktu hirak ne'e, rezulta lezadu sofre moras maka'as no bubu iha reen-toos, moras maka'as iha kabun no halo lezadu te-tan an. Lezadu halo tratamentu iha Ospitál Suai no sosa mós aimoruk ho montante US\$ 10.00 iha apoteka.

Prokurador akuza arguida sira kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa.

Produsaun ba prova sira

Antes tama ba produsaun ba prova sira, bazeia ba artigu 262 KPP kona-ba tentativa ba konsiliaun, juis husu atu halo tentativa konsiliaun ba arguidu sira no lezadu.

Iha prosesu konsiliaun ne'e, tribunál husu ba arguidu sira atu selu fila fali lezadu nia sofrémentu ho montante US\$100.00. Maibé lezadu lakohi osan refere maibé husu deit atu arguidu sira la repete sira ninia hahalok iha futuru. Arguidu sira konkorda ho lezadu nia pedidu ne'e no arguidu husu deskulpa ba lezadu. Arguidu sira mós deklara katak sira arrepende sira ninia no promete sei la halo tan krime ne'e iha futuru hasoru lezadu no ema seluk.

Alegasaun finál

Prokuradór no defeza konkorda ho akordu dame ne'ebé parte rua decide ona no husu ba tribunál atu omologa prosesu ne'e.

Desizaun

Bazeia ba pedidu dezisténsia hosi lezada no akordu dame hosi parte sira, tribunál konklui prosesu ne'e no omologa akordu dame entre parte sira.

9. Krime kontrabandu

Nú. Prosesu	: 0016/16.BBBGD
Kompozisaun Tribunál	: Koletivu
Juis	: Dr. Benjamin Barros, Dr. Samuel da Costa Pacheco no Dr Nasson Sarmento,
Prokuradór	: Dr. Matias Soares
Defeza	: Dr. Albano Maia (advogadu privadu)
Tipu pena	: Pena multa US\$60.00

Iha 27 Dezembru 2018, Tribunál Distritál Suai preside julgamentu leitura akordaun ba krime kontrabandu ne'ebé envolve arguidu Silvester Mau hasoru Estadu RDTL, iha Sub-distritu Tilomar, Distritu Covalima.

Akuzasaun Prokuradór

Prokuradór akuza katak iha 09 Jullu 2018, tuku 06:00 dader, arguidu hatama gazolina jerigen 4 ne'ebé kada jerigen ho litru 35. Kada jerigen ne'e arguidu sosa ho folin U\$25.00 ho totál US\$100.00. Arguidu hatama gajolina ne'e mai territoriu Timor-Leste, liuhosi Betun, Malaka, Indonezia no hetan apreensaun hosi membru PNTL-UPF ne'ebé halo hela patrolamentu no vijilánsia ba atividade ilegál sira iha área fronteira, Motamasin Sub-distritu Tilomar.

Prokuradór akuza arguidu kontra artigu 316 KP kona-ba kontrabandu ho moldura penál hosi tinan 2 to'o tinan 6.

Produsaun ba prova sira

Iha prosesu julgamentu, arguidu konfesa totalmente ba faktu sira iha akuzasaun prokuradór nian no deklara katak gazolina ne'e nia sosa hosi ema Indonezia maibé sosa iha área Timor-Leste nian no hetan kaptura bainhira lalin hela gazolina hirak ne'e. Arguidu mós deklara katak nia sosa gazolina ne'e ho objetivu atu faan fila-fali hodi sustenta oan sira nia eskola.

Alegasaun finál

Prokuradór konsidera arguidu provadu hatama duni gazolina mai Timor Leste ho ilegalmente, tanba ne'e husu ba tribunál atu kondena arguidu ho pena suspensaun ba pena prizaun tinan tolu fulan rua. Aleinde ne'e, gazolina ne'ebé hetan prenda, husu atu afavor ba Estadu.

Entretantu, defeza konsidera katak arguidu sosa gazolina ne'e iha ona área Timor-Leste nian inklui sosa hodi fan fila-fali ba interese oan sira nia eskola. Tanba ne'e, husu ba tribunál atu aplika pena ne'ebé adekuada ba arguidu.

Desizaun

Depoizde avalia faktu sira hotu, tribunál prova katak arguidu komete duni krime kontrabandu liuhosi hatama gazolina litru 140 mai Timor Leste ho dalan ilegál. Bazeia ba prova ne'e, tribunál konklui prosesu ne'e no kondena arguidu ho pena multa US\$60.00. Pena ne'e arguidu sei selu gradualmente US\$1.00 kada loron durante loron 60. Bainhira arguidu la selu pena multa ne'e, tribunál sei aplika pena alternativa ba arguidu atu kumpri iha prizaun durante loron 40.

10. Krime violasaun seksuál ho agravasaun

Nú. Prosesu	: 0184/16.PDSUA
Kompozisaun Tribunál	: Koletivu
Juis	: Dr. Samuel da Costa Pacheco, Dr. Nasson Sarmiento no Dr. Benjamin Barros
Prokuradór	: Dr. Matias Soares
Defeza	: Dr. Escolástico da C. N Maia (advogadu privadu)
Tipu pena	: Absolve

Iha 27 Dezembru 2018, Tribunál Distritál Suai hala'o julgamentu leitura akordaun ba krime violasaun seksuál ho agravasaun ne'ebé envolve arguidu APMhasoru nia kolega ho idade tinan 16, iha Distritu Ainaro.

Akuzasaun Prokuradór

Prokuradór akuza katak iha Setembru 2015, iha atividade feira ne'ebé realiza iha estadiun, arguidu rasta lezada ba iha estadiun kotuk, iha aifunan laran, arguidu ameasa atu oho lezada no obriga lezada halo relasaun seksuál. Arguidu hasai lezada nia ropa no arguidu nia ropa, hatoba lezada iha arguidu nia jaket leten no halo relasaun seksuál ho lezada to'o ejakula. Lezada sofre

ran sai maka'as hosi nia vájina. Depoisde halo relasaun seksuál, arguidu amesa lezada atu la konta sai ba nia famíla. Maibé lezada konta sai akontesimentu ne'e ba nia tian.

Liutiha semana ida, lezada ba hili ai-maran iha kafé-laran no hasoru arguidu. Arguidu hatun tiha ai hosi lezada nia ulun no halo relasaun seksuál ho lezada to'o ejakula. Antes halo relasaun seksuál ne'e, arguidu mós amesa atu oho lezada kuandu lezada lakohi halo relasaun seksuál ho arguidu. Aleinde ne'e, depoisde halo relasaun seksuál, arguidu nafatin amesa atu lezada labele konta sai ba nia famíla. Aktu hirak ne'e, rezulta lezada grávida.

Bainhira famíla hatene lezada grávida, famíla husu mane ne'ebé fó oan ba lezada no lezada hatan katak arguidu mak fó oan ba nia. Durante lezada grávida to'o lezada partu iha 08 Agostu 2016 (bebe nia vida la bele salva) arguidu la tau matan ba lezada ho nune'e lezada hato'o keixa ba polísia.

Prokuradór akuza arguidu kontra artigu 172 KP kona-ba violasaun seksuál no kontra artigu 173 KP kona-ba agravasaun ho moldural penál hosi tinan 5 to'o 20 prizaun.

Produsaun ba prova sira

Iha prosesu julgamentu, arguidu rekoñese katak nia halo duni relasaun seksuál ho lezada maibé tanba lezada mós hakarak. Arguidu hatutan katak iha primeiru akontesimentu, bainhira arguidu ba soe bee-kiik, derepente lezada hakuak arguidu hosi kotuk no kaer arguidu nia liman. Ho nune'e arguidu husu ba lezada atu halo relasaun seksuál no lezada mós hakarak. Iha momentu ne'ebá arguidu iha kondisaun lanu. Iha segundu akontesimentu arguidu deklara katak relasaun seksuál ne'e mós akontese tanba konsentimentu hosi lezada.

Iha parte seluk, lezada deklara katak arguidu la amesa no la obriga lezada hodi halo relasaun seksuál tanba lezada mós konkorda atu halo relasaun seksuál ho arguidu. Maske nune'e, lezada deklara katak arguidu la hemu tua nune'e arguidu la lanu.

Alegasaun finál

Prokuradór haktuir katak maske arguidu no lezada deklara katak akontesimentu ne'e tanba hakarak no hakarak, prokuradór mantein faktu sira iha akuzasaun, no husu ba tribunál atu kondena arguidu tuir pena ne'ebé hakerek ona iha artigu 173 KP.

Enkuantu defeza husu ba tribunál atu absolve arguidu hosi krime ne'e tanba relasaun seksuál ne'e akontese tanba lezada fó nia konsentimentu. Defeza konsidera katak aktu arguidu nian ne'e la prene rekezitu sira hosi krime violasaun seksuál.

Desizaun

Depoisde avalia ba faktu sira hotu, tribunál konklui katak krime ne'e akontese tanba konsentimentu hosi arguidu no lezada. Tribunál la hetan prova arguidu amesa ka obriga lezada

hodi halo relasaun seksuál. Bazeia ba konsiderasaun ne'e, tribunál absolve arguidu hosi akuzasaun prokuradór nian.

Atu hetan informasaun kompleitu, favor kontaktu:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.tl

info@jsmp.tl

www.jsmp.tl

Telefone:3323883 | 77295795